

海  
虞  
詩  
話

海虞詩話卷六

單學傅師白輯

金文學大椿字庭瞻裕齋子吾先子師也學而不厭溫其如玉  
晚年不樂居南范遷金匱縣月子河卽甘露鎮也一傳而無後  
詩稿散佚僅得其送范曉莊丈游豫省云已看輕舟出浦南一  
杯村酒勸難酣綠波碧草傷心影直接中條翠色嵐又一聯云  
手摹古帖龍蛇勢口詠新詩金石聲

王文學文棫原名臥龍字莪伊書體雅健蘇園仲賞之喜作詩  
無子卒後覓其遺稿不得偶見題孫菑園司馬烈婦顧孺人傳  
後一章亟錄之王道本人情大節貴自矢禮云嫁從夫豈必從

夫死嗟哉烈婦顧結縈半載耳偕老有成說夫病忽不起之死志弗移此志當誰知以彼清冽水瘞茲冰雪姿後死纔一日烈婦猶謂遲聞者淚如雨烈婦甘如飴男兒際艱厄苟免良可嗤爲語採風者聽我烈婦辭案烈婦居老吳墅夫死墜井乾隆二十一年事後嗣徵詩余亦有作

單山人德基字孔昭世居寶巖號巖厂居士少貧困十二歲偶得南華經愛之鈔讀卽通其理後乃博涉古今尤邃於易言理言數之註精熟數百家適又得舊鈔祕本喜曰更熟此則管公明郭景純其可企也丙夜披覽室中火作燬其本自是不復談易乾隆丙子夏疫母病弟死一身奔走飢疲歿年三十六未娶

無嗣所著書五六種皆散佚有攘爲己作者詩初學東野繼益  
多師卒後友人爲鐫二卷十之一二耳續古劍歌云金精夜墜  
神冶紅化爲寶劍如游龍吳鐔周脊燕秦鋒幽靈共語懷英雄  
持淬清水忽飛躍冠軍喋血髮如鶴旄頭彗孛青霄落指揮造  
化開冥漠旋舞空中凡幾日欲尋所親無其匹遊俠骨峭懷激  
烈小儒咋舌氣蕭瑟關山月云萬竈秋聲裏高天垂大荒雪浮  
嘶馬影風散寄衣香邊柝誰高枕胡笳各異鄉旅魂隨皓魄夜  
夜落空牀邵叔仁皆極譽之佳聯如佛日遊山寺云花氣浮春  
遠江聲落四天別晉超云花月吹長笛風霜拂寶刀礪溪圖云  
大人一釣海山動孤石雙痕風雪荒山梅云片影直凌東海雪

一香遙動萬山春觀棋云戲爲孤注甯嘗敵計出重圍有戒心  
姚文學齊宋字贊元號古愚居支塘喜交名人留連詩酒老而  
著書蠅頭細字積稿三四尺許曰讀史彙編三十二卷淞南筆  
語四卷四書章句金鑑十二卷其狎鷗軒詩文賸稿十卷道光  
中令嗣季方鐫之病中聞置棹成戲作二律茲錄一首云螻蛄  
烏鳶且慢爭殘骸恃木若金城惟規七寸符前制敢望千秋蓋  
後名天上玉棺今不降人閒石槨久難成笑予未死先周備鐵  
面閻羅請便行雅量致足挹也長子文起亦有詩稿

邵大令步瀛字碩林號梓風由明經輸粟官四川岳池令著有  
光音詩草未之見也僅於湖海詩傳中見詩五首寄酬永昌佛

容齋太守云忌影蓬門宴始開更無屐齒破蒼苔天涯蹤迹三年隔夜半音書萬里來不是黃堂能愛客可知青眼解憐才蹉跎久負春明約慚愧清時伏草萊比盧攜之文自有首尾也

黃文學士鎔字元文號聽翁偉然丈夫性喜爲人藥石鄰有匪人祛其篋事敗自戕於室爰書成遣戍陝西乾隆戊申遇赦兼得軍功六品銜榮歸著鷗盟越俎一卷皆警世之言詩亦能寫其憤鬱詠史云偉哉張子房幄中埽楚氛卓哉李長源山中定儲君經綸開草昧調護褒元勳身抱鸞鳳姿不入雞鶩羣袍笏等腥臊裙屐栖煙雲狡兔徒鑽鑿獵狗空炙熏下視直一呾鄙之如飢蟲筆意頗凌厲也題蕭王堂一律尤咄咄逼人皋陶明

允古堪風近亦科條盡變通枉自貽殃幽狴紆忍因獻媚斬英  
雄半生碌碌無奇節決勝庸庸少寸功料得淮陰逢地下尙嗟  
高廟自藏弓又詠漢武云帑竭四朝緣黷武無尊萬世賴崇文  
區分功罪如老吏斷獄

邵直刺倫清字景葵號鑑堂乾隆二十八年進士知江西弋陽  
雲南永善等縣仕至廣西直隸州知州工長律尤擅七言采烈  
興高風雄義峻誠卓犖才也乙卯孟秋送費筠浦中丞之任江  
蘇云帝曰俞哉惟汝賢敕書移節斗牛邊蘇臺風月聯裙屐茂  
苑鶯花沸管絃玉色釵聲浮畫艇綠珠絳樹簇瓊筵近來風俗  
多奢蕩只仗中丞振德先江南財賦甲神州幹止惟期歲有秋

盛世兵刑原靜戢窮檐絲穀困誅求山川綺秀勞生聚井牧駢  
闐費鞠謀君子道存非小補衡尊斟酌懋前修讀項羽傳云鹿  
走中原樹羽旗入關猶自用荊尸八千子弟揮戈日百二山河  
燎火時黃鵠高飛羞呂后烏騅不逝哭虞姬從來得失渾閒事  
羨爾雄風扇九陲佳句如玩月云人事每從微處見天心只向  
靜中看讀劉後村詩云刮磨鬼怪紛拏日剗刻山河破碎時丁  
亥八月感賦云重耳豈能忘晉國寤生本不恕京城龍燈云活  
潑潑疑橫野戰氣熊熊作御天行年過八十家門寥落或勸其  
鐫稿行世答曰黃金難得正不如歡筵中作纏頭具矣豪狂之  
興既老不移如此檀默齋滇南詩話嘗稱之柏古堂詩鈔三冊



存詩八百餘首鈔本當所自訂道光甲申張止箴以百錢得之  
市上距其歿才星周耳余讀而悲之因再摘錄猶恨長律不能  
及也在保陽主講蓮池書院和少陵秋興韻如狡兔依然穿月  
去大鵬未敢背天飛征夫淚灑摩天嶺歸鴈聲沈倒馬關死生  
親故隨黃鶴浩蕩生涯付白鷗皆雄傑悲壯尤愛其再用前韻  
中二首云形勝無如松杏山當年百戰指揮閒珠囊委地排天  
闕鐵騎如雲入漢關豈有賓王歌白馬更嗟降將爲紅顏只今  
威德覃沙漠羌羯胥歸鳳閣班混同江接白山頭韃韃雄兵嘯  
冷秋席捲臨潢遼主遯鯨吞松漠趙王愁鴛鴦灤外無鷹鷂魚  
藻池邊狎鷺鷗颯颯商颯吹木葉黃龍本不是神州情至之作

則追悼孫宜人云轉瞬流光六十三邊荒兀兀髮鬢辛勤孤  
負營巢燕僵仆空餘退繭蠶荼苦薺甘俱夢幻槿榮柏瘁總心  
惓夜臺寂寞君休怨我亦悲秋百不堪逝者如斯歎六年重來  
舊署倍潸然零香遺挂都無迹別鵲離鸞詎有緣兒女各悲天  
萬里功名莫問歲三遷爲君此日營齋奠腸斷哀猿落照邊返  
葬仍教厝淺原空林蝶化卽陳根漫尋鳳卜他生約賸有牛衣  
舊淚痕三十九年愁裏過八千餘里哭聲吞宦途隄寒君知否  
魂若歸來與細論

蘇直刺去疾字獻之號園公乾隆二十八年進士由庶常改主  
事仕至貴州直隸州知州中年謝病享林下之福三十餘年書

法超逸詩境高邃與桐城姚惜抱獨相得故壽姚六十有海內  
同心人與子猶耕耦之句蓋皆孤峭人也感春云載籍多遺訓  
豈謂不見之如何但狂趨終日無一施乘陽推化出甯復待來  
茲雜花生繁林童冠詠而歸水濱行欲暮輕風飄我衣熙熙初  
皇民宛然遊一時正爾觀所尙勿謂春遲遲寫懷云我思羅夫

子

維典字微五號慎齋乾隆辛未翰林改御史遷鴻臚卿

養母歸湘潭獄麓且終焉盛年

早拙簪遂令南楚士服教感至今丈夫抱特節出處在一心豈  
顧塵土閒營營浮與沈江水深以長可以彈素琴續陶魯直句  
云放開眉頭過日豎起脊梁做人陶句淡飯麤茶餬口竹籬茅舍  
存身可想見其爲人矣所鐫蘇園仲集五卷予嘗品爲真漢玉

云

周大令榮字義山乾隆四十三年進士知獲鹿縣調武清降級  
輸貲復授曲江令卒於途余借得其家藏乙未丁酉兩年手稿  
又與趙春澗唱和詩又讀十六國春秋五古皆古體多於今體  
共七十餘章思清筆健雅有才氣蓋深於此道者也在吳門所  
刻晴坡吟稿二卷乃少年戲作挂於衆口所不敢知茲故略錄  
數首以見並非不能詩耳讀十六國春秋云奮拳漚麻池倚嘯  
東門市有目不知書而能諳其理直辭斥夷甫快事乃有此彌  
浚既以摧屠各亦就圯天奪右侯早不得竟魚水北面儕隳彭  
自知洵爲美狐媚欺人孤曹馬當羞死採茶行云冰厓一夜香

車裂萬壑枯槎夢初驚雨沐霞烘日氣蒸  
蔌蔌枝頭生雀舌我昔芒鞋建水南  
幔亭峯下恣幽探連林響過蠻奴鼓帶露攜來  
越女籃聞道六安風景似顧渚南源皆可喜  
竹外遙知翠釜煙人家一月香雲裏  
豐臺春老花茫茫六街日日花風香對花閒  
煞盧仝碗卻憶深山午焙忙爲張景峯題  
趙春澗山水畫障云寒風鳴枯條空堂氣蕭索  
安得雙玉虹陡向素壁落決肯層峯出  
林表立峯嶢嗑然方一笑乃是趙侯之所作  
憶昔經過大茂腳徑轉秋毫壁面削一峯橫  
出如崩雲奮怒向人勢欲搏恨無董巨手  
松閒共磅礴開圖忽失喜清景恍如昨  
趙侯參畫禪能事豈肯受束縛有時鬱勃寫奇氣  
霜穎秋空吐廉鐔不然掩關

恣臥游攬取煙霞入吟橐南衡廬北吳嶽萬壑千巖一芒屨何  
日相攜入畫中流水柴門橫短約趙大經云起仿坡公題吳道  
子畫一峯二句能狀奇景末幅神來情來結更淡遠佳構也

趙大令同翮字振六號巢寄再白子也乾隆三十年舉人咸安  
宮教習期滿選知微縣時甘肅行納粟例州縣捏災冒賑侵盜  
百餘萬君獨無染同僚竊笑其拙及大獄興人咸服其守正識  
遠焉調張掖有殺人無蹤跡者由是罷歸仍以教授自給或言  
君可謂兩袖清風矣答曰僕有清風并無兩袖故姚古愚齊宋  
贈詩云兩袖清風袖并無斯言如戲實非誣僮奴抱怨家人笑  
贏得廉名滿道途詩承家學自寫所見華陰謁楊太尉墓云驅

車出華陰道旁穹碑峙大書懸白日關西楊夫子伊予讀小學  
開編夙仰止暮夜懷四知千金藐弗視天地實鑒之不獨我與  
爾聖學首慎獨斯言探厥旨所以盛德業照耀垂青史末俗重  
財賄苟得非所恥庶幾聞其風貪夫可興起况予今服官幸復  
過墟里生平竊誦法展謁增遙企此心無可欺願言保終始抵  
徽縣云萬山深處列千廩屋瓦鱗鱗此地偏扶杖郊前勞父老  
停驂雨後問原田那能坐理調絃軫祇恐流亡愧俸錢時值入  
游饑  
境憮然頻自省下車新政請奚先其餘如教期俗易談何易清  
被人知迹未高訟無留獄空懷古官有遺逋恐累人才多莫漫  
歌誰嗣政拙惟應賦遂初磴磴自信平生守莫使他年悔讀書

得賦遂初差自慰家聲清白未曾汙皆儒吏之言蓋讀四子書有實得者

言大令朝楫字用舟號耐僊乾隆二十七年舉人歷知婺源貴池浦江等縣喜臨池每日必撥冗作字三四百至老不倦雖以趙吳興爲宗而秀媚蒼健非墨豬所能髣髴也解組後湖山嘯傲得酒中逸趣有題漁隱莊詩序曰嘉慶甲子耐僊年六十六矣先是戊午築漁隱莊於邑東郭暇日飲憩甚樂去年席子晴懷下世曩寂寞因倩工肖像於莊思吾常與吾周旋榜曰漁隱主人像聯曰意不在酒樂取於魚係以五律四首藉此消遣殘年異時泉下遇晴懷相視一笑云爾肖像漁莊裏而今吾認



吾水邊時下釣石畔任傾壺不是封侯相真宜作酒徒況今鬢  
鬢白久矣食蕪鱸隔歲晴懷逝吾今增一身難追泉下客新得  
素心人比影猶存質招魂此更真皮囊已可笑幻相轉堪珍生  
日同劉海癡愚亦握螯凡夫如我輩蓬島恐難添杯酌猶能勉  
仙家定不嫌網魚招赤鯉騎去莫留淹愛水吾天性池塘處處  
幽明知攜不去略使迹還留異日誰能計浮生暫結儔放懷三  
斗醉何必詠山邱風趣超逸脫盡塵俗其像一手握螯一手持  
杯晴懷席明經名世宣談風酒德高絕一時漁隱莊一名閒園  
亦謂習池

倪布衣賜字三錫號閒谷行止高潔時謂爲清閼閣中人物居

東塘墅嘗除夕鼓棹訪王柳南說詩論文達旦而去潘芭湄獨  
慕其高致善畫蘭有香祖居詩鈔擬古云自君之出矣顧影極  
無聊思君如積雪見日始能消又縱多歸夢家何在猶有名山  
道未窮獨吟好倩詩仙和怕醉偏隨酒客游皆警拔

沈處士啓熬字扶坤居桐官山家有文境樓乾隆癸酉與潘芭  
湄鎬吳耕心駿諸君爲詩酒之會扶坤次吳景山韻云樓非名  
勝僅憑岡瑤什還生蓬筆光秋入海天增曠境風來草木有真  
香無邊詩思連橋遠不盡辭源瀉峽長雲路相期同努力彈冠  
安用學王陽芭湄爲輯江皋唱和集中有沈枏美云檻逼銀濤  
煙雨亂眼空塵境海天長陳寒云星河靜轉關山夜草木先知

天地秋又沈廷璵中秋云風高碧漢驚橫鶴雲約滄波穩臥龍  
沈基美云一片冰輪初出海萬條雪浪欲飛龍皆氣韻沈雄追  
步唐軌有欲與不得者卽次集中韻嘲之有鋪張白地光明錦  
補綴江皋破碎秋之句因之罷會

湯處士鼎字象九號調軒有玉茗齋詩草居近小吳市乾隆甲  
申康明府基田剏書院於昭文境若梅李智林正修清水皆聚  
其鄉之士而課以文海東書屋地尤僻陋徧訪得君命役召之  
君瞪目曰官以民召當效子來今召者士而不以士禮召孰謂  
能下士哉於是特優禮之田園雜興云吾廬吾愛小橋東水漲  
扁舟亦莫通草色入簾涵宿雨鳥聲繞屋暝春風交游不出漁

樵外學問無過稼圃中三十年來成底事漫隨村社祝年豐又  
雨挾潮聲夜到窗酒向繁花徑裏沾綠陰閒坐聽農歌皆希風  
范陸者

周文學兆鼇字愷序號約亭以醫名世安和沖淡辭致清深躁  
妄者與坐片時亦如受其鍼砭也暇卽吟咏趨向香山石湖之  
派譬諸早韭晚菘絕有佳味曉至戈氏莊云塔影山光送曉行  
水雲深處見柴荆雨來小艇生寒色風入垂楊作軟聲半畝溼  
煙籠碧芋滿籬清水漉香秔分明一幅幽風畫祇恐良工畫不  
成按戈莊爲明代畫師戈汕所居結語尤見典雅小寒食云江  
城寒食欲來時小小佳辰賞亦宜淘井漫尋蘇氏夢看花愛讀

杜陵詩雨拖柳線煙猶斂風入梨雲影欲敲記取今朝乘興處  
一陂春水坐船時佳句如石梅看雪云石磴輾鋪雲作絮梅梢  
遠引玉爲鞭晚霽云滿楊松聲茶竈火半天琴韻紙鳶風梅花  
云才堪宰相猶爲賦春到江南便作魁卽景云天於晴久風來  
暖山到春深分外青寒食云僻地風花高會少貧家歲月禁煙  
多兀坐云女來硯北繙丁字雞唱牆東報午時全稿固求不獲  
令翩翩雲表兄亦未之出偶於瞿梅屏處見其乾隆壬子元旦  
至清明逸稿五紙就以選錄又有云年餘六十猶強項話到吟  
詩興便生年幾八十乃終不知錦囊之富究何如也

史文學慶全字謙吉號益生有三惜居詩鈔淮陰侯云終始此

韓信誰能問俗情貧窮一市笑富貴一軍驚武鄉侯云三國多  
人才一覽衆才小早成梁父吟晚作出師表殊侔儻也

范直判春林字東叔居釣渚自號釣閒少孤家貧久瘡而黃人  
稱黃東叔當寒戰時恆手一編負喧牆下喜踏月夜遊野外稍  
長以名諸生邀恩貢就職直隸州州判嘗夏日讀書天龍菴之  
前軒牆嵌一石如碑坐而倚焉旦暮不起背汗透入石內圓瑩  
如鏡今尙在也筆墨高寒如其人品詩鮮近體文跂堂單協唐  
來宿云清心攬秋月對景吟涼風夜半寂難寢起行疏竹中犬  
吠林閒影燈匿幽廬紅漁歌來前湖天景渺覺空卽事一欣適  
眷眷惟君同同協唐雲慶橋夜遊口占云颼颼風荻響渺渺月

湖光爾我正無賴吟歌各放狂白雲起水色疏葉發宵涼不覺  
秋懷盡漁天一笛長贈單協唐表弟云出入共里閭嬉戲在童  
穉兼之硯席親篤以重表誼踏歌湖上月追捉松閒風鸞鶴幼  
難馴癡絕與我同陳迹空俯仰釣游緬平生忽忽年俱壯見慣  
各不驚巷邊齊肩樹昔日見來往爾我今成人樹亦高逾丈世  
務迫及身東西各謀食日後當何如眼前已難憶喜爾能努力  
悲爾幾失職我無以教爾輾轉我心惻爾之樂於我二人年正  
強弟兄惟爾長門戶惟爾忘爾我有懷抱儻得盡他日爾時爲  
我言我時爲爾說思爾重思我從今並折節前二首清幽遶迴  
後一首非僅見氣誼隱居求志之況亦踊躍毫端矣

何副貢忠相字二山崇明人流寓昭文乾隆中邑令康茂園基  
田延之主講梅李書院嘗取最無義理之文各閱一通何背誦  
不遺一字康兼聽一通乃亦能背誦何詩學昌黎堅奧有骨竭  
意烹鍊禱神辭云萬念已灰冷惟謀一日養瘠薄失參苓鮭肉  
差能強母讓兒腹腴兒求母口爽家食本無文勸進滋勞攘轉  
憐聽不聰大聲競盼蟹庶幾無疾病忽復疑苛癢減膳戚自今  
加餐記疇曩曩健闕甘柔今衰徒憊惘緬彼捕魴獺淩波時下  
上反哺亦知恩烏也真吾黨人而不如物何以施俯仰吁嗟古  
之人至誠得神獎神今怒不佑兒罪將焉往殃咎甘兒身陳辭  
激稽顙孝思誠篤不減古人兩宿黃東田宅云本是殷勤訪翻



疑邂逅逢人生非鹿豕吾輩恰驢蚩花影涼臺酒雨聲隔寺鐘  
古歡追不足絮語勸從容將赴正修書院老母意惘惘也感賦  
二律尺水江湖闊扁舟去住疑暫分驚老淚未出問歸期最是  
衰殘候翻同幼稚時呱呱看弱女繞膝不曾離那復三年宦并  
難一息離出山終有日報國已愆期朝亡夔龍滿庭巢烏鳥私  
平生薄溫嶠裾絕欲何之五律三首皆工於起勢以勁逸爲能  
者又溼螢依草認前生七字殊新

僧果唯一名化唯字旦豁號玉泉喜種梅因又號梅庵陶玉章  
潘芭湄諸人皆與唱和謁甫里先生祠云甫里瞻遺像高風契  
素襟亭孤芳樹合碑斷綠苔侵花雨新禪悅煙波舊隱心恍疑

綸釣在漁笛遞清音梅庵疊韻云爲愛冰姿映碧潭玉泉從此  
號梅庵春回虛檻臨流坐雪霽孤筇繞岸探禪夢依依留硯北  
吟魂忽忽度溪南半窗疏影清於水和月參差伴夜龕栽梅百  
本罩寒潭點綴偏宜水繞庵送客路從雲底出題詩花向雪中  
探珠林不夜明窗畔玉蘂先春寄隴南說與雛僧培護好後來  
常此住香龕又和許白村梅花云臘盡峯頭見素顏逗春芳意  
有無閒銖衣舊夢羅浮客香雪今標鄧尉山曉望樹連雲共白  
冷吟人與鶴俱閒一聲玉笛吹殘後紅紫千林儘可刪壓倒羣  
芳竟不知相看誰賞出塵姿溪頭獨立春先覺竹外斜撐月亦  
奇清氣凝神原自澹東風吹豔復何施能從萬木枯邊放儘受

寒欺也合宜又弄影虛涵潭底月伴吟寒立雪中天東風慣作  
傳香使明月長爲寫照人皆神韻有餘可朗吟於暗香疏影間  
不至汗辱梅花者

僧化輦字蓮溪號雪航西陽陳氏子爲聖通僧高弟嗣主三峯  
寺嘗刻其師拙存語錄能詩書畫著水月舟外集王介社畫梅  
贈鮑深之因題一絕云幾回雪嶺訪清芬寒勒春前鎖凍雲摩  
詰窗前芳草信和香寫贈鮑參軍山居一絕云綠陰如水夏堂  
涼一榻高眠午夢長忽被隔林鳩喚醒落花風裏焙茶香素修  
堂天真閣集中俱有白雲棲八景次僧化輦韻蓋皆與唱和也

海虞詩話卷七

單學傅師白輯

王明經岱字雲上一字次岳介祉之弟書畫秀逸先娶席氏名筠能詩生平出游必挈家眷人謂有李益之疾故孫心青贈詩有游亦攜家總累情之句後卒於楚地蓋兄弟皆客死也詩未見全稿題蘇甘漁畫浣紗圖云前沈後揚誰之功村女浣紗致彼美儼若姬昌姜里囚臣罪當誅獻妲已成王成霸藉蛾眉聖賢豪傑幾窮矣嘗膽謀深若弗聞奉心贖好誰能擬傾城一个越忠臣羞殺萬千犀甲士甘漁善寫古名姝卻寫微時食貧技妍於桃靨帶微赭弱似柳絲扶不起誰識耶溪一寸波便是汪

洋沼吳水此少作識力可尙燕子磯云危磯似燕飛不作呢喃  
語翩然大江濱四顧無儔侶此見今詩所見集殆可稱絕唱矣  
予又記一犁春雨種鳧茈七字

吳文學輪光字重暉號珥河耽詩早卒受業於范東叔心契殊  
至師弟多聯句之作春夜云遠鐘何處落夜水正悠然師月影  
溪邊動書聲竹裏傳弟少年真可惜多病得相憐師慚愧侯芭  
契今宵一問玄弟玩五六語其師似有先幾之哲矣松江舟中  
云孤舟延曙色水氣逼人涼搔首思殘夢開簾非故鄉草深黃  
耳冢潮落白牛塘望望機山外高堂鬢已霜六月十四夜同單  
協唐嚴小完坐芬來書屋云涼影墮空碧卷簾開素襟明河收

夜氣孤月漏秋心靜隱子綦几清言中散琴塵機那堪憶溪上  
渺漁吟風致清微幽儻與先君子唱酬詩幅篋中尙有存者書  
法亦端潔

王司馬本智號愚谷良齋侍御次子體豐而短人戲呼爲王二  
糲子累試不第友有錄其文得鄉舉者旋通籍後爲安徽學使  
而愚谷適以輸粟宰盱眙相見歡然款曲倍至其年縣試愚谷  
所擢前十名皆入學焉尋遷桃源河務同知謁孟廟云宮牆規  
曲阜肅肅峻重門里尙三遷舊師同百世尊人皆稱好辯道不  
絕微言撫拜瞻遺像還疑浩氣存嚴陵釣臺云先生誠隱者漁  
釣爲逃名不願王侯貴但耽山水清亭臺遺舊迹魚鳥契幽情

我到亦心曠江空又月明儼然作家也丁亥七夕霍山作一律  
恰如銀河清淺彌復宵深蓋善寄縹緲之思者一彎新月照疏  
星坐對涼風拂墮螢天上有期成會合人閒何事尙飄零漫聞  
烏鵲能填漢不信蜘蛛可乞靈寂寞夜深何所見溥溥清露溼  
空庭佳句如夜宿平樂云虛牖月明驚客夢空庭蟲語喚鄉心  
淮陰釣臺云功業豈同屠狗伍英雄亦爲羨魚來邯鄲呂仙祠  
云神仙不死今何在富貴浮生世總癡皆極警動

范文學柏燠本名思煌字肇封號退齋居鈞渚渡東叔之兄鄉  
人稱二范事母孝力學工書遊江右浙西詩多散佚與先君子  
契厚故尙存其懷單野亭一律云總角相親愛人稱單范交恆

傾肝與膽何止漆投膠春雨花分帶秋林鳥共巢江天帆影動  
念爾攬長菱又單師白表姪家貧學富今春府試第一偶與看  
菜花得絕句贈之村店由他紙價增試作傳鈔尋春且共步西塍知  
君不羨金鋪地雪盡螢乾要一燈見者無不歎賞

金上舍樾字侶韓號樵雲居邑西金家村卽慈烏村也八歲師  
以鶯梭織柳絲命對應聲云燕剪裁花片性愛詩酒頗跌宕自  
喜遊京師歷齊魯皖豫數年題梅小坪土舍冷梅圖云可是林  
逋手種花繞廬疎影動橫斜千枝香雪澹春色一片白雲空月  
華君是幾生脩證果我方三載悵離家彎環十里寒溪路歎息  
栖遲願尙賒格局清澈佳句如海音樓云山銜明月上風挾大



江流大觀亭云風帆三楚暝煙樹六朝寒簡宗牧匡云入洛羨  
君能作賦涉河憐我久忘家秋柳云班馬一聲衰草路亂蟬幾  
樹夕陽村有唾餘集二卷

金上舍輅字壽封號耐雲亦慈烏村人性閒逸工畫蘭好琴有  
古琴名鶴友游息與俱愛杭州西湖挈家僑寓里有賸產棄弗  
問也與馬青湖曹仙耨輩詩酒酬酢略無虛日後貧老不能歸  
詩多散佚戚屬王臺裒所存者爲耐雲遺稿阮芸臺尙書輯兩  
浙輶軒錄錄二章焉閒居云賃得湖陰屋數椽端居暇日坐如  
年斷炊始覺難爲客有酒何妨便學仙翻以長貧辭俗累每於  
多病悟情緣無魚豈但羞彈鋏向溪頭問釣船客况可憫也

佳句如和徐鐵顱云性癖交常淡情多夢亦癡岳墓云空餘大  
樹皆南向更有何人議北征感遇云季子多金原有嫂買臣失  
路便無妻

高參軍桂捷字蔚林居旺兒橋雅喜文事嘗延先君子課子因  
贈之以詩次韻答云單子今鬢焦春風快接歡毫端羅古博眉  
樣入時看師範尊山斗朋簪馥茝蘭後生熏德善不慮瓣香寒  
命意遣辭應絃合節先君子戲比之牛渚遇袁虎蓋高常在漕  
糧艘中也他作未見

周孝廉昂字若干號少霞居蔡涇乾隆三十五年由甯國府訓  
導中式舉人負才氣工詞曲著作頗多持擇未嚴致滋遺議耘

稻歌云農功無一非作苦苦至耘田難爲語荼蓼既朽苗其熙  
溽暑薰蒸汗如雨主伯亞旅裸乃前綠簪加膝結束全竹絲作  
圈挂之項開張眉睫取輕便纔履陌頭便長跪雙髻拖泥行帶  
水爬剔偃僂氣不舒以手爲鉏疲十指辛勤十指敢言疲力抉  
根株痛弗辭父老還聞戒鹵莽恐遺根莠種潛滋日輪向午熱  
於火宛轉行閒顯勤惰半身漉漉似探湯世間牛馬較勝我如  
斯作苦苦我民粒米得不如珠珍貧家健婦亦事此惜不令彼  
長吏見之耳是題少摹寫切實之作因稍點竄而錄之過馮定  
遠墓云遺蛻深埋老樹根斷碑新拭碧蘿痕

趙秋谷孫顯官  
吾邑重修墓道心

傳一脈聯師弟韻事千秋屬子孫

子舊有死生無一  
面師弟足千秋句

澗冷蛟螭

蟠俠骨

定遠武藝絕高

松深風雨動吟魂騷壇近日多衰颯賸馥殘膏

可得存過葛家術懷陳司業云過閭延伫問儒英人爵翻因天

爵成海內文章推宿老榜中名姓比諸生

先生成進士不殿試而歸

聯銜列

薦鄉評重

蔣文恪歸昭簡交章薦經學

小字加批帝錫榮教授江村邀異數

園橋多少企行旌

欽授司業未赴

二詩可資考證稿已刊不多錄

瞿大令頡字孚若號菊亭居五渠乾隆三十三年舉人本名顥

後避仁宗諱改今名知鄴都縣有政績精於音律著有鶴歸來

鴈門秋等院本並巴蜀見聞錄四書質疑數種嘗得錢蒙叟秋

水閣舊額懸之渠上草堂因卽以名其集書朱買臣傳後云男

兒宦達蚤有譽五十富貴妻已去故鄉典郡亦足豪邸吏懜惶

晉失措朱幡五馬會稽來此是當年負薪處可憐覆水竟難收  
自經溝瀆莫肯顧嗚呼買臣妻世無數祇今邑子誰嚴助君少  
年鄉舉十一試禮部不售己酉春試出院云那堪後進推先輩  
漸覺同來少故人又云身隨九陌春俱老心逐三條燭並灰蓋  
感慨深矣解組後予猶及見之語及春明仍鬱鬱云

董明經如珪字桐君年過八十齒落更生好畫梅絕無師法然  
佳者別有領悟可入逸品自題詩云殘春一夜雨紅盡綠冥冥  
造化不如我梅花紙上馨又云朔風作惡常吹雨小屋凝寒未  
覺春吾屈東皇駐池北令梅朵朵盡精神亦如老榦著花也佳  
聯如山行云松花飄落香黏帽澗水奔流響作琴歸棹云山圍

樹外疑無路塔聳城頭漸到家聽諸子讀書云天色無過新霽  
朗人聲只有讀書清又如淺水蘋花逐浪香順水帆飛勢入雲  
句亦佳

朱明經宮桂字佩芳號蕤湄居李市肆力制舉文試不得志多  
爲五七言以抒悵鬱有咏史百律前秦苻堅云東海興謠兆業  
昌真教艸付王咸陽談經尙幸宣文在輔政偏嗟景略亡倉卒  
八公驚鶴唳崎嶇五將恨龍驤英雄肯爲幽囚屈瞋目猶爭璽  
一方三四能舉大要餘如漢惠帝云招來大隱鬚眉古得遂高  
飛羽翼成魏王操云頓挫威名橫梁後曾驚狀貌捉刀時晉元  
帝云佐命也同營窟兔偷安殊愧渡江龍後趙石勒云東門早

白鷺王衍北面終當事漢高石虎云玉牀漫設蓮花帳金殿將  
成棘子林唐玄宗云呼來學士吟飛燕養得驕兒欲化龍南漢  
劉鋹云軍威卻笑驅神象女寵誰教嬖媚豬宋徽宗云金營帑  
幣輸何益玉闕仙真禱不靈元世祖云儒教乍聞興北土王封  
先已畀西僧明武宗云黜陟全歸司禮監巡游忽號大將軍莊  
烈帝云國鈞屢易綸扉任軍政猶令宦寺監此等皆可與同時  
謝蘊山開府詠史詩頡頏所著黃葉村莊全集未梓子名詒燕  
亦能詩

錢布衣美字中美家五渠號渠上人善寫花卉郊蘭坡云幼時  
在塾見渠上人日攜一囊中置詩稿畫具飲以酒則揮灑數扇

吟哦而去題畫蟹云說是潭塘金爪蟹鄰翁分送到吾家今朝  
好過黃花節只少一壺酒未賒先輩風趣今不復見矣

金處士琳字含光少有文名康茂園明府宰昭文時稱爲智林  
書屋中雋才其交游多太倉名輩詩則許培秀韻竹軒集切磋  
最似者也擬古云高山絕人迹寒巖白雲深清水生紋波長松  
栖逸禽中有幽居士不受塵俗侵入戶蕭然空但懸綠綺琴會  
得無絃趣妙理愜我心大道貴沈寂豈敢望知音又春色園中  
滿灼灼繁花紅遇時誠足誇時過萬事空青門種瓜叟昔日受  
秦封貧富偶然耳何乃燧其容高士樂天命躬耕安我窮琴樽  
聊自適悠然太古風意高語重居然作手寒影云西風吹不散



明月思無端觀棋云相對默無語機心自此深詠菊云秋容豈  
易老寒到自生香贈友云之子不得意行藏世莫知皆清新獨  
闢而親老旅魂驚悲歌寒落日依人始覺文章賤等句更警絕  
矣周若千孝廉素與交自長安歸見其吟到秋風三徑冷看殘  
黃葉一天寒之聯謂具此襟懷恐他日過訪含光避我入竹林  
中也

柏文學應曾字松年號慎亭舌耕心織無術送窮逕館湖濱其  
幼兒謂舊館爲家涕泣求返慎亭傷之因題一律云聽到癡兒  
哭拋書暗自嗟一枝聊爾借三徑已無家愚拙安吾素聰明望  
汝除夕陽回首處煙外羨歸鴉蓋讀者亦爲神傷也寄湖南諸

友云同社吟情近若何藕花村裏幾經過湖頭雨歇堪移棹莫  
管儂家酒債多足見貧士雅懷著有荷花莊小稿

陸孝廉金鱗字丙嘉祖治城孝廉父名國瑛字書宣乾隆戊午  
順天鄉舉自以祖若父皆登賢書矢志踵武性本沈靜苦入場  
喧擾文思不屬時邑中饒富城隍廟日演劇值月之三六九日  
必至鏡亭前躑躅搆思腹稿既就始歸錄之蓋取其至喧擾也  
如是三載乾隆三十六年竟捷鄉闈一上公車年四十遽卒子  
亦相繼歿遂無後著有遂園吟稿未刻予偶見諸翁氏因摘錄  
四詩春曉云玉妃喚月歸瑤水銀鴨煙消臥屏裏夢斷梨雲響  
轆轤雪衣銜索呼人起花壓闌干春色香含情小立揀紅芳摘

芳只向垂檐樹不遣羅襦惹多露此能得風人微旨矣唐太宗  
云一將才難本自知有唐誼辟首爲推舞陳七德猶多懼朝滿  
羣雄尙數思受諫長如懷鷁日保民無異掇蝗時能將此意全  
同氣立武門前更示誰後梁云芒碭風寒練雀摧回天錫號事  
堪哀曲池酒歇真龍盡寢殿戈鳴控鶴來縱使留皮存戰士如  
何穿鼻少雄才一朝聚泣呼皇甫可憶當年教授回後唐云十  
指縱橫滅大梁後先叛守在河陽繡囊豪氣三鼓矢椒殿憂心  
一瓣香蘇合異時忘采擇銅光早日恣荒唐漫言生鐵勝菩薩  
一紙誰看制石郎三詩論高格健不愧作手許韻史明經金照  
秋濤孝廉夔兄弟深得丙嘉師資之益家祭必別設一筵報之

曹文學士俊字用三號逸亭任俠摟網乾隆末褫衿遣戍赦歸  
乃幡然作吏孫心青觀曹掾詩感賦所云昔時見吏頭搶地今  
日漢儒身作吏刀筆千言亦自豪儒冠一誤何妨棄是時年已  
七十矣平生篇什頗多早行天門山云地絕天門聳山盤澗戶  
開石銜殘月落樹擁曉雲回振策穿飛瀑看碑拭古苔崔嵬傷  
陟彼誰與酌金罍兩嶺山云南北分雙嶺東西豁一天無風聲  
滿谷雨氣奔泉怪鳥嘯深箐陰厓凍溼煙日斜澗戶裏冰雪  
照吟鞭贈庭柏云古柏問年知者稀高逾百尺大十圍蔽我老  
屋無炎暉我初力構此屋住非愛此屋愛此樹今我與樹形同  
寓老龍鱗甲皮骨堅古心古貌何脩然想是五百年劫餘此仙

我攜一琴一壺酒置座不離君左右忘形之交歲寒友君不見  
高山絕壑振颿風有時根拔隨飛蓬不若支離偃息在此老屋  
中籠雀行云毛羽不文口不語彼鳥胡爲樊籠處翔鳴本性未  
全忘啄粟依人豈得所浸假開籠縱爾飛翻身應向舊山歸冥  
鴻避弋人猶纂莫道林深便息機讀淮陰侯傳云彭越蒯瞶蒯  
樊樊外戚乘權內主尊諸呂機宜除國士深宮倉卒召王孫解  
衣不負平生遇挈臂誰聞深夜言不是勃平持大計又看漢鹿  
逐中原寄託迤深俠氣自在也餘如京口別諸兒云隔岸青山  
少今宵白髮多香嚴寺云樹老花多異僧閒鳥不驚和春居云  
書田耕雪夜錦字織花城韓信嶺云尙從雲夢會豈悔荆通謀

西安城云自昔風雲三輔壯至今游俠五陵多秦川憶內云三  
晉雲山愁作賦五湖煙水夢歸田廣陵云次第園林依曲水周  
遭風月會平山清陰樓避暑云但見鳥還有倦意不知魚樂亦  
清心莫愁湖云六代歌聲終玉樹四時煙景逐盧家皆佳句也  
張侍御敦培字叔因號息園靜谷子也乾隆四十年進士官至  
山西道監察御史年十八九旦晝勤讀倦甚就枕籠雞牀下一  
鳴卽起因雞鳴時或參差乃易以香寸度而線縛之線末繫輒  
下承銅盤火至線斷鏗然擊盤卽瞿然披衣時范東叔館顧虞  
東家僅隔一河每月月落參橫誦讀之聲遙遙相應君自著年譜  
云爾性靜而和平居若無所長值軍機處政繁暑促則落紙風

生從容具辦治家嚴肅起居皆有繩尺有藹秀軒集詩不多見  
輒以孝養爲言如辛亥予告歸養江口守風云計程何日到琴  
川黃菊丹楓並騁妍遲我一腔歸省願寸心長共片帆懸他作  
類此不備錄詠白秋海棠有粉牆低映似無花句殊可愛

俞學博江字源岷號澹齋乾隆十二年舉人知永興縣改選無  
爲州學正在任最久以老罷歸詩格近香山鹿城感興云桂花  
香裏繫扁舟半繭園荒未足游債了風櫓剛十載吟酣月榭恰  
中秋重來舊館皆新主久別青山欲白頭獨有文章堪不朽震  
川遺集故長留雜詠云農歌聽罷短牆東拾得遺秧一兩叢蒔  
向小庭添野趣借看穎粟識年豐又云牡丹秋到已萌芽富貴

機緘莫漫誇須得人工培植厚春深纔許發奇葩又輓陳見復  
云赤黻已曾襲積學青燈猶自守殘編辭意亦頗工切

僧明印字久方主蘇城怡賢寺實吾邑人工書及寫意山水著  
聽松窩詩稿贈蘇梅山云梅山居士坡仙後能以丹青闢戶牖  
如其雋雅筆亦隨邱壑要是胸中有白眉

季常

嶼仙

邱園

不復作斯

道吾鄉幾袖手惜我一幘早飛去文人之墨良非偶近聞畫院  
貴清真傳呼不用畫師名會看振妙清冥上同功六籍君其人  
語溪迢迢遠莫企白蘋香清風聲聲神妙儼許金粟傳我有素  
壁花市裏雅逸殆自眉山得來梅山居士卽蘇孫瞻字耕漁

席女士筠字琴德生長釣渚渡王次岳元配也居西莊草堂夫



唱婦酬一時名輩蘇園公吳竹橋諸人春秋佳日詩文談讌水  
窗高挂山色當筵中饋羅列酒漿寂無聲息籩豆靜嘉一屏隔  
若重城閨儀可想也先君子亦恆在座嘗言如此惜不永年寄  
外客邇上云丈夫處牖下窮經歎寂寞壯遊適四方願勿悵離  
索伉儷莫纏綿雲山且酬酢揚州月二分小杜去誰託夫子啓  
絳帷不比趨蓮幕勝地與英才入手快何若名士競從遊故鄉  
鮮此樂高堂得旨甘穉子解歌謠惟有其兩情悠然渺無泊不  
知春淺深一任花開落竊擬卷耳篇豈同草蟲作方嗤錦字詩  
休把刀環約努力向天涯鴻飛恣寥廓無爲戀藩籬飲啄爭鷄  
雀此閨閣中大手筆也歿後次岳爲鐫瑣窗餘課一卷故隨園

詩話亦及之

蘇女士琇字若瑩園仲從妹適銅山張守業能畫著有河梁集  
破齋苦雨云入夏雨連綿茅齋劇可憐牆頭飛瀑布牀下涌流  
泉擁被驚還起堆書溼又遷羨他枝上鳥葉底正安眠

席女士仲田字養卿景溪舍人次女適屈煥發其詩幼承父教  
閒雅有則月下梅花云碧天無際夜無塵浮動花光一樹春世  
上羣芳誰似此堪同月姊對清新春日云曲曲雕闌繞畫廊東  
風簾映滿庭芳春情何事濃如酒纔著夭桃又海棠可與言美  
刺矣早卒姊亦恒序其綠窗小詠略云聽雙成之歌曲風前忽  
散彩雲傳道韞之題辭險畔尙留白雪最憶天涯伯姊

恒自紅  
謂也

豆盛囊賸哀地角家君青燐化血所以相思字字夢殘雷岸風  
波遠望朝朝腸斷泉臺聲歎

包女士鏡清幼聞鄰人汪浣菴撫琴好之請爲女弟子十歲能  
成聲尤長梅花三弄貧無佳琴借蔡氏琴彈五年矣有力者賂  
蔡攘之鏡清乃買舟攜琴載酒邀汪琴師夫婦同泛尙父湖中  
流停斟酌泣數行下爲別鶴之操曰琴乎琴乎與爾無緣乃如是  
乎吾與爾從此別乎旣歸月餘病卒時十五歲也口占答人云  
但聞琴上聲不知琴上絃問妾住何處山下傍琴川

海虞詩話卷八

單學傅師白輯

蔣文學杲字溯陶居羊尖市南半耕半讀行比矩方人戲呼爲  
蔣鐸吾邑方言憊之謂也輓單野亭云識君自髫齡與君成莫  
逆相距五六里相思度阡陌相愛示肝膽相親同硯席二范爲

畏友

謂退齋  
釣閒

各自相鞭策二范既長往惟君數晨夕攜杖相存

問煙波繞園宅白首老龐妻花前互扶掖教兒名已成弄孫歡  
益劇而我喪妻兒飢寒更交迫視君老境佳襟懷一何適正將  
頌古稀獻歲斟靈液誰知騎鶴去冒雪舒仙翮老淚流縱橫俯  
仰痛陳迹傷往行自念一慟消精魄先生從不作詩悲發於誠

竟成佳構如此

許明經金照原名金標字朗軒號韻史又號澹梅居士文行謹飭和李滄雲學使消暑三十詠次元韻詩序云天孫度繡譜之金鍼還勤自課海客探瑤華於珊網別有家珍蓋情每寄於素耽斯興卽乘乎清暇况夫籤盈冊架鄴侯之學富五車筆振蓬山供奉之詞傾三峽宜其簿書偶憩不廢高歌而休沐餘閒亦親柔翰也乙巳長夏中州學使李滄雲先生當歲校之旣周適星軺之暫駐萱庭問膳方依愛日而承歡蘭砌含飴恰值薰風之解愠爰成消暑之章遠婉凝香之句題緣景撰兼樂事於天人韻以次拈譜平聲之上下蔚爲典則謙質賓僚運匠巧於郢

斤無心合道見華鬢於貝葉有目知妍從茲鳳味堂開朗照坡  
公獨炬仵見蓮花幕馥爭攜王儉齊紈標學愧蝸黏識慚蠹測  
頻年浪迹徒吟東閣之芬爾日叨陪重負南州之譽敬承雅屬  
未敢固辭勉嗣元音用塵藻鑑向韓門而正律非安希賈孟之  
閒欽馬帳之多才竊願附戴彭而後云爾賞雨云清風散煩鬱  
山澤氣潛通愛物旻蒼意爲霖良弼功雲陰生遠岫虹彩匿長  
空杜老詩催就襟懷禹稷同對月云舉杯誰是伴涼夜有心知  
鑑朗凝輝遠庭空久坐宜關河牽客夢礎杵引秋思可許乘槎  
去姮娥訂會期澆蘭云室有輞川意幽香磁斗舒當門原不礙  
爲佩况相於氣味與之近滋培忍或疏未知空谷裏芳信更何

如削瓜云解渴推珍果分甘興亦佳蜜筍流素液冰谷破陰霾  
涼覺詩脾沁清知非味諧當筵環祭處希聖欲心齋曝書云室  
中何所積數卷舊傳家凡物聚於好惟吾生有涯叢殘珍翰墨  
荒落感年華曬腹難希郝囊螢且學車捕蟬云美蔭休常戀膠  
絲已暗承吟風秋欲到破夢客應憎未淨少年習渾忘炎景蒸  
痴僂猶擅巧憐我百無能皆於細膩熨貼中兼比興之妙而揮  
扇上半首同是招涼友紈葵一例看袖誇籠月好心憶踏冰寒  
尤工妙也

周文學天田字耜杓性敏悟未冠游泮中年以峪血疾歿次劉  
蕙圃韻云流螢避扇入窗虛消夏吟成意自如行傍小池殘暑

退月明清露滴紅葉佳句如溼雲歸海疾宿霧散風輕一行新  
鴈影千里故人心溼雲林外盡新翠雨中來虎邱云七里波光  
花市曉半窗山影酒家春述懷云不得意時成好夢最關情處  
聽秋聲湖田卽事云半城半郭非塵境宜雨宜煙是水鄉皆頗  
清新

嚴文學祺字辛復號小完居玉市苦寒守繩尺事母孝與先君  
子交互有切劘暮境益困游閩悵快而返韻語悽切憐兒女云  
茹苦憐兒女時時兩鼻酸日中腸未飽秋杪眼猶單懼扑嘵號  
忍懷羞冷餓瞞硯田稜有限亦自識予難得家書言大雨牆倒  
壓破竈釜屋更敲側云平安未足慰愁思况說牆傾大雨時涼



夜旁風何以蔽危樓孤木豈能支履霜未料堅冰驟見兔方知  
顧犬遲此日范丹塵飯破遙憐有米亦難炊寒士讀之當同聲  
一哭也

管明經坤載號虹橋善談名理以種菊自怡詩偶作也曾勉耘

先生任羅山令

復補福建汀州府信化縣

捍禦白蓮教匪有功聞訃云無端

蜂螳撼孤城曾向羅山學統兵正有書生能擐甲忘身報國是  
生平半生作吏古汀州嗚咽汀波定不流聞道一官無長物清  
風千里送歸舟人咸以爲親切

陸文學景雲字番三早卒著有爛仙詩鈔紅梅云孤山豈有杜  
鵑魂卻向瓊枝認淚痕一枕依稀林下夢美人遙在杏花村其

風調可賞佳句則屋矮對山堪放鶴齋空無事且聽鸛澆破詩  
城香倒甕鑿開愁障銳攜鑊又病中詠雪云敲枕渾無驢背想  
空教冷落一天詩此已作於曇花將謝時矣

蔣布衣侯字元康以博學廉讓著名里中喜著書彞門詩集門  
人邢治南邵敬輿刪定錢湘靈詩鐫本俱非全豹積久搜輯至  
二十六卷惜未付梓人不盡見也駁海虞詩苑小傳十數條可  
資考證然柳南之所輯錄書本未竟責人無難爲善者將氣沮  
矣詩皆戛戛清新叮畦獨闢彈鋏行云馮煖彈鋏胡爲乎爲君  
把劍思當初一彈食有魚再彈出有車非是馮煖善彈鋏馮煖  
幸作田文客我今有鋏未敢彈欲彈先歌行路難有車彼自策

徒步誰見惜有魚彼自食不飽誰相憶一彈再彈寫鬱湮主人  
不問左右嗔願將劍缺挂君室閉門且待田文出古釵歎云玉  
釵尺一鏤鳳文井泥初拭顏色新向爲冠導人不識誤入妝臺  
付美人美人持與今釵較古釵樣拙今釵巧巧者簪頭拙者藏  
象牙爲匣錦爲囊歎爾不合時世用錦囊象匣徒增重答天都  
汪文學云君問山中老鐵牛野花歲歲劍門秋詩文塔毀心還  
在化作閒雲澹不收

自註鐵牛湘靈法號竹裏詩文煙劍門門人嚴寶成輩爲建石塔題曰錢湘靈先生

詩文之塔今不存矣意致尤妙

黃上舍竹堂字穎禪號前因居士工書法爲蔣戟門司農倩代  
入都作日下新謳百六十首疏注詳明能使覽者如身歷其地

予既選五十首入大觀集因別無傳作復錄四首風景江南竟

宛然鳬鷺泛泛滿平川萬泉莊外參天柳來趁陰涼看水田傀

儡排場有數般居然優孟具衣冠絲牽板託竿頭戳弄影還從

紙上看

傀儡之戲不一有從上以長絲牽引者為提偶有以板託平移動者為推偶有置竿上自下持之運動者為戲偶

別有剪紙象形張隔素紙搬弄於後以觀其影者為影戲風捲塵沙盪九達行人何處辨鬚

眉暫休古廟防訛認新塑泥胎采未施趁廠輪躑蹰塞路途書林

畫藪接長衢公卿名翰懸招賣美玉何曾韞匱沽

琉璃廠自東至西列肆紛

陳書籍字畫古玩應接不暇每逢燈節游人最盛名曰趁廠

陳明經聲和字叶宮號筠樵少負才名曾經袁隨園獎借著有

響琴齋詩集入都新樂府九章頗近香山茲錄其二趕車夫面

熬黑風沙多耳鼻寒車下走芒鞋穿有時側坐車轅邊卻愁轅  
重車不前愛惜馬力不忍鞭趕車夫太辛苦得毋困飢寒無財  
作商賈答言家有十頃田近接都門百餘里婦女習桑麻不曾  
識羅綺有翁課農兒讀書偶市酒肉歸可喜我習趕車已廿年  
賴此得錢勿我鄙客聞此言歎息頻其人樸陋情率真吾鄉風  
俗無此淳又二把手挽者在前推者後雨天雪地不敢走有時  
得意如乘槎布帆三尺捲浪沙仰不高軒俯不軾坐客欠伸慮  
傾側忽然壓面高車來御者意氣如風雷揮鞭叱汝讓中道道  
左還噴礙邊套可憐排擠入坎中兩人推挽力亦窮此客倉皇  
意消沮道旁強就老翁語大腹高臥車中人得毋官長非貧民

老翁笑客見何淺世路傾敝原不免人生貴賤視所乘彼此易位仍相凌按詩中布帆三尺之句非空言也二把手車有張帆以趁風力而推挽較輕者南人或未見矣

學傅先君子諱繼華字協唐號野亭邑諸生居釣渚樸誠醅謹論文以古法今情爲要訣詩不多作聽禽曲云空山無人鳥嚶嚶悠然夢醒初解醒乍疑嘹亮桓伊笛轉訝悠揚子晉笙遂攜一甌茗靜坐雙耳傾傾彼得時意悟此求友聲落花無言流水清濯濯野鹿方食苹千章夏木午陰晴能解我悶怡我情我愁我喜鳥無與一聽再聽心和平人生心賞天然趣何處乾坤塵慮生吳竹橋太史評云非唐非宋亦唐亦宋心境湛然寓舍長

春花云羨爾終年放空階一色侵吾家亦種此培養未曾深蓋  
虛兒輩廢學之作意尤和婉云

學傅胞叔際周字百祿弱冠有志奮發體壯實居近金匱縣之  
甘露鎮遭暴疾一宿而卒僅存罷釣一絕云釣得魚盈簾棹船  
湖上歸緣隄煙月滿秋氣入蓑衣

吳禮部蔚光字哲甫號竹橋別號湖田外史乾隆四十五年進  
士由庶常改禮部主事逾年告歸著有素修堂集學傅游門下  
與其羣從作新柳詩師以爲未盡新字意致亦作四首以示作  
法云感在清明節已前嬌黃淺碧動人憐蛾眉祇配初三月馬  
首纔瞻又一年短短柔條遲拂水纖纖弱縷早含煙有情無力

供驅使難當青絲白玉鞭幾葉緘分幾葉舒數枝勻閒數枝疏  
乍回生意桓公樹漸近閒情靖節廬十五細腰猶不似一雙摻  
手恰相如東風依樣重裁翦慣是章臺二月初枯楊亦有卜生  
稊陽長陰消得氣齊今古一同成幹運乾坤兩大露端倪杏花  
此日交飛燕柑酒何人約聽鶯瀟岸隋隄春又到只愁不度玉  
關西約略丰姿到眼新已經攀折送行人輕狂慎勿吹綿絮嫩  
軟先看颺麴塵妙緒紛披如勝舊巧思穎發爲推陳武陵漁父  
從茲後好向桃源再問津又中庭海棠盛開半月歌以祝之西  
府海棠我手栽已十三載應候開今年盛極勝於昨壓倒滿樹  
硃沙梅始焉驪龍作春睡未蟄先蟄新正雷一鬚變作一寸線



額下亂繫紅珠胎祥雲朵朵忽齊捧羯鼓疑有青皇催奇如赤  
城標特建巧若金翦刀分裁上元絳節此時下函關紫氣何方  
來不知迺是傾國色千姬萬媵紛追陪佩腰水蒼雜韎鞞飾首  
火齊兼瓊瑰蒲萄酒酣夜讌頰燕脂粉暈晨妝顚嫣然顧我盡  
微笑接歡何患無良媒自榮至謝十五日一日傾倒三徘徊參  
天大異籬落寄得地終免斧鋸摧祝花明歲更益盛定爲汝會  
羣仙才設汝蔽日紫絲障築汝避風黃金臺題汝詠雪青鏤管  
酌汝醉月白玉杯花似聞言亦欣喜否則飛舞何爲哉作詩在  
嘉慶辛酉越祭亥而師捐館矣

李刺史書吉字敬銘號小雲乾隆四十五年舉人知宜良縣升

雲州知州與杜藕莊鈞張補裳繆同官滇南時稱詩中三傑檀  
默齋萃尤推重之並列三家於滇南詩話入平彝縣界云滇陽  
聞說勝黔陽入境遙瞻第一坊食祿奚能違定數居官可否稱  
宜良輕徭緩闢蒔花圃惜俸先裁豢鶴糧何術便堪臻上理阿  
儂來自子游鄉默齋云此初入滇賦以明志也小雲選宜良奏  
對聲低幾得對調卒止乃歎數也輕徭惜俸仁恕之本宜臻上  
理故所至有聲家居傍言子游宅推本愛人易使絃歌爲治當  
胥漸泯棼時慨乎言之詩本性情性情原於學道宜其醅雅矜  
貴度越羣流矣郡齋卽事云月窟天根關禹門蜀滇屏翰一麾  
尊崑崙脈下青獅立星宿源分白馬奔造士良方先講學撫夷

善策在推恩時清不用籌邊略試聽歌聲遠近屯默齋云永北  
頗有士大夫家劉氏談氏爲首劉由翰林官至方伯造士講學  
有其基其地三面環江最爲險固不用籌邊也佳句如題補裳  
集後云詩人多遠宦名士少高官小集云隔簾花氣清如客入  
座琴聲冷似官看菊云但教有骨何須傲若是名花必帶寒題  
照云堆徑落花留鶴迹過橋流水寫琴心醴陵道中云秋風竹  
影聞湘瑟夜雨蘅香讀楚辭湘江云辭賦至今尊屈宋山川自  
古重衡湘阿止莊道中云三家言語分夷漢一日炎涼換葛裘  
述懷云十年案牘心頭血三邑創痍髮上絲羊流店云無淚也  
看羊崇碣有胸且盪岱宗雲廬陵懷古云黨人後死留君實好

友平生重曼卿引疾云寶玉宦鄉饑曼倩梅花歸驛病相如謁  
韓文公祠云南斗有時聯北斗揭陽何處望咸陽鵝城感懷云  
風塵長鋏雙蓬鬢天地扁舟萬里家呈蔣節帥云喜聞說士猶  
甘肉特爲何人命取茶皆具名士風概且諸體俱有妙處祇因  
遠宦詩名不著鄉里所鐫寒翠軒集六卷蓋由濟南而入杜陵  
初則著紙皆竹露蘭煙之氣後乃檜柏輪囷矣其切磋於默齋  
而體近之也略同邵鑑堂在吾邑可稱遊滇二傑

許文學枻初名公璧字懷庚有鵠峯詩草幼隨其父古初就學  
外舍年十二卽能吟詩寫蘭秋夜云涼夜當三五冰輪分外清  
樹疏鴉動影溪靜獺傳聲不盡關山興正多邱壑情西風吹海

甸盪水畫樓明

沈明經庭暉字旭之號怡雲喜風雅愛修潔琴牀筆格位置曲  
房幽榭之閒絕遠翳塵詩品亦足稱之嘗選錄元詩以專步趨  
小窗五詠其一爲守梅花舍云爲愛橫斜致軒窗特地開孤山  
閒氣味處士老風裁探信圍鑪話憐香禁笛催更能攜一鶴終  
歲共追陪其二爲觀魚榭云小築池餘址觀魚荇藻香架空緣  
徑狹引勝藉廊長月到西檐晚風回北牖涼客來憑檻坐樂意  
擬濠梁其三爲仙人葉船室云浮家與泛宅故事昔賢留彼以  
舟爲屋我偏屋作舟不行真自在無觸又何尤好比仙人葉寔  
瀛到處游卽此三詩可想見其雅懷矣

龔文學灝字海濤號葦江居吳塔復安太翁壽九十餘君年過  
杖國早五代一堂嬖媚孺慕兼務讀書漁釣樂事不數楚老萊  
也夏日讀武夷山志云赤日著地炎火熾修竹當窗弄空翠荷  
花香入溫風溫烹茶泛雪無人至鳴蜩聲歇晝如年檢函偶得  
武夷志武夷溪流有九曲三十六峯秀特矗其中高人逸迹難  
枚舉古今題詠不勝錄須臾手倦拋書午夢圓飛身徑到仙宮  
前左挹浮邱袖右拍洪厓肩過幔亭登仙船又有亭名一覽遊  
客可憑藉佳木無秋冬積雪寒盛夏正看雲霞千里迷山溪忽  
驚一聲竹隔雞驕陽在牖蜩又噪還向書中尋武夷早起云晨  
雞三唱罷獨起坐檐前蛛網凝涼露蟾輪墮碧煙妙香空際送

爽籟靜中延旅館多愁思長吟感遇篇雪中云一寒酣夢醒吳  
儂曉起清光欲盪胸低唱清斟非我事騎驢獨上最高峯題晚  
菰雙兔小幘云飽食菜根君莫笑養成仙骨廣寒游君七困鄉  
闈此詩或以自寓然未幾令嗣榮卽登嘉慶丁卯賢書結語實  
爲之兆矣又雜感云請纓每羨終軍少祕計偏談曲逆奇胸中  
故非無物者又溪橋候月云似嫌引客生鄉思不放清輝印碧  
溪亦妙

馮布衣文植字培三號亦樵二馮先生後也娶於翁爲予內姑  
丈書學柳誠懸通金匱方玉髓經諸家言詩本家學不多作亦  
不苟作拜墳行云少年拜墳隨我親親先我後拜錦茵今日拜

墳親先在墳中人是拜墳人人入墳中呼不起未入墳如一彈  
指保身入墳恰復難保墳悠久何易言有子有孫未可恃我欲  
拜墳心已酸拜墳漸老拜且憊我常拜墳墳不壞不堪我不似  
我親親入墳中有我拜蓋老而無子故詩尤淒絕稿皆散佚此  
獨爲予婦月如拾置匳中因得見之婦又嘗誦其晚歸吟云朝  
朝嵐翠沾衣溼帶入城中算住山詠蟬云糧餐仙露氣清虛皆  
雅人吐屬也

嚴孝廉大綸字經之乾隆四十八年順天鄉舉位之孝廉胞兄  
敦行孝友手書珍芸近草數十章字體端方詩亦如之月夜云  
不著纖雲滓太虛團團秋月渺愁予顛牆靜照寒蛩語隻影偏



描兩鬢疏如水潑來孤帳外隨鐘清到五更初遙知鵲鵲峯頭  
望一樣光明及做廬按此在京邸時作故結處云然

許上舍浣字惠時號秋槎有西橋小集爲其表兄王柳南點定  
付梓對雪用東坡韻云墮空素質最輕纖望裏寒生朔氣嚴疊  
韻恍傳諧柳酒和羹笑問備梅鹽因風存想珂鳴玉集霰先聞  
馬響檐撫景流連從白戰許持只有筆鋒尖

朱上舍正己字慎旃號敬夫有蛾術稿吳門懷古云崇臺高下  
委寒煙傾國西施亦可憐千載館娃宮裏月清光還照五湖船  
時人稱之

僧顯更字改菴號過也善寫蘭竹小山云添得祇園秀平堆一

角山青嵐浮樹底碧岫列窗閒徑曲旋縲聳溪斜匹練環雲栖  
寺憑作案低翠擁禪關

繆女士端字靜軒廩生玉麒女城居適釣渚范醒園武生名兆  
英爲予左鄰戚長中歲孀居予幼恆嬉游其家見其紡綿得句  
卽呼兒書之每示予釋之蓋以予有會心而兒不甚解也後見  
予婦月如大加歎賞雖月如自諱不知書莫逃其鑒也范君素  
好杯中物村酒日三四沽恐妻勸阻故瓷醃瓦瓶常藏懷袖及  
和服中人咸笑之繆懷先夫子云自賦桃夭過卅春家風齋粥  
共艱辛一朝永訣成千古得酒徒思愛酒人已未端陽云重五  
新符貼滿梁每逢佳節總神傷冥君三醯菖蒲酒權把泉鄉作

醉鄉黃魚買得重冰鮮未祭先教淚雨漣  
囑付兒孫敬焚帛冥中聊作杖頭錢讀之  
悽慘欲絕又老感云光陰如水去悠悠屈  
指于歸四十秋岷岵有懷泉壤暗鴈鴻無  
主寒雲愁殘編欲讀花生眼故鏡羞看雪  
滿頭不遇荒年已貧困忍將衣食付兒謀  
苦情如繪矣絕句佳者已選入大觀集

趙女士秉清字若韞知福甯府補廬太守  
貴棧長女著有寄生館焚餘稿感吟云素月  
何皎皎秋來揚清輝如銀又如水照我入  
房幃悄悄積憂思對此長歎歎生小有志  
願習靜悟禪機一旦失怙恃孤雲苦無依  
量力守舊轍且耐寒與饑年長諳世味始  
知從前非人生譬朝露疾去如風飛時乎  
不我與淚下沾裳

衣按先輩治家嚴肅者三姑六婆不聽入門若韞守貞雖鍾愛於親實由少年誤信尼姑之誕說迨老而無倚悔恨難追旁觀者諒其苦情當知禮經二十而嫁之義古今不易此詩直道衷曲非特不必爲之諱正可闡明以廣垂戒王道不遠人情曰寡曰獨安可自貽伊戚也若韞得其戚邵孝廉淵耀乞詩於汪中丞後又請旌少慰身後矣